

প্রতিপাদন করা হইয়াছে, তাহাই শ্রীগুরুচরণ সমীপ হইতে অবশ্য শিক্ষণীয়—এই অর্থটিও দেখান হইয়াছে। যথা—

তস্মাৎ সর্বস্বনা রাজন্ ! হরিঃ সর্বত্র সর্বদা ।

শ্রোতব্যঃ কীর্তিতব্যশ্চ স্মৰ্তব্যো ভগবান্ নৃণাম্ ॥

২।২।৩৬ শ্লোকে শ্রীপাদ শুকমুনি মহারাজ পরীক্ষিত্বে কহিলেন—হে রাজন্ ! নিখিল বেদের মুখ্য অভিধেয় শ্রীহরিভক্তি । অতএব, মানবমাত্রের সর্বান্তঃকরণে সর্বত্র এবং সর্বদা ভগবান্ শ্রীহরির কথাই শ্রবণ করা, কীর্তন করা ও স্মরণ করা অবশ্য কর্তব্য ।

এই শ্লোকে যুগপৎ “সর্বত্র” ও “সর্বদা”—এই দুইটি পদ উল্লেখ করিয়া শ্রীহরিভক্তিরই অবশ্যকর্তব্যতা প্রতিপাদন করা হইয়াছে । পুনশ্চ, পক্ষান্তরে অন্য অর্থ করিয়া দেখাইতেছেন । অস্বয় ও ব্যতিরেক মুখে ‘সদা’ পদের অর্থ যোজিত হইয়া যাহার অবশ্যকর্তব্যতা প্রতিপাদন করা হইয়াছেন, তাহাই শ্রীগুরুচরণ-সমীপ হইতে অবশ্য শিক্ষণীয় । এইরূপ অর্থের প্রমাণ যথা—

স্মৰ্তব্যঃ সততং বিষ্ণু বিস্মৰ্তব্যো ন জাতুচিং ।

সর্বের বিধিনিষেধাঃ স্ম্যরেতয়োরেবকিঙ্করাঃ ॥

সর্বদা শ্রীবিষ্ণুকে স্মরণ করা কর্তব্য, কখনও বিস্মরণ হইবে না । নিখিল কর্তব্য-উপদেশ এবং নিষেধ-উপদেশ শ্রীবিষ্ণু স্মরণ ও বিস্মরণেরই কিঙ্কর । অর্থাৎ নিখিল বিধির রাজা শ্রীবিষ্ণুস্মরণ । নিখিল নিষেধের রাজা শ্রীবিষ্ণুর বিস্মরণ । অতঃ সকল বিধি নিষেধ এই দুই রাজারই কিঙ্কর অর্থাৎ অনুগত । যেমন রাজার মর্যাদা করিলে কিঙ্করগণ আপনিই সমুপস্থিত হইয়া থাকে, তেমনই রাজবিধি বিষ্ণুস্মরণের মর্যাদা রক্ষা করিতে পারিলে তাহার অনুগত নিখিল বিধিরই মর্যাদা রক্ষা করা হয় ; আবার নিখিল নিষেধ-রাজ্যের রাজা শ্রীবিষ্ণুকে বিস্মরণ না হওয়া-রূপ মর্যাদা রক্ষা করিতে পারিলে নিখিল নিষেধ-উপদেশের মর্যাদা করা হইয়া থাকে । এই প্রমাণে অস্বয় ও ব্যতিরেক মুখে এবং “সতত” পদ যোজিত করিয়া শ্রীবিষ্ণুভক্তির অবশ্যকর্তব্যতা প্রতিপাদন করা হইয়াছে । পক্ষান্তরে অর্থ করিতেছেন যে—বিধি ও নিষেধ সম্বলিত পদ এবং সর্বত্র এই দুইটি পদে যে কর্তব্য উপদেশে পাওয়া যায়, তাহাই শ্রীগুরুচরণ-সমীপ হইতে অবশ্য শিক্ষণীয় । এইরূপ সাফল্যের দ্বারা অর্থাৎ অস্বয় ব্যতিরেক ও “সদা সর্বত্র” পদ যোজিত ভক্তির অবশ্যকর্তব্যতা বিষয়ে প্রমাণ যথা—